

佛说不增不减经

元魏天竺三藏菩提留支译



南無本師釋迦牟尼佛

说明

本简体校正版《佛说不增不减经》电子书，根据《乾隆大藏经》大乘单译经，第 0520 部，元魏天竺三藏菩提留支译《佛说不增不减经》原藏影印本校正。句读仅供参考

本电子书是免费结缘品。特此说明。

仁慧草堂

二〇二〇年三月



扫码关注仁慧草堂微信公众号

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处
结祥云. 诚意方殷. 诸佛现全身.

南無香云盖菩萨摩诃萨 (合掌三称)

净口业真言

(三遍)

唵. 修唎修唎. 摩诃修唎. 修修唎. 萨婆诃.

净三业真言

(三遍)

唵. 娑嚩. 娑嚩秫驮. 娑嚩达摩娑嚩. 娑嚩秫度憾.

安土地真言

(三遍)

南無三满哆. 母驮喃. 唵度噜度噜. 地尾. 娑婆诃.

普供养真言

(三遍)

唵. 誝誝曩. 三婆嚩. 鞞日啰斛.

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

佛说不增不减经

元魏天竺三藏菩提留支 译¹

如是我闻：

一时，婆伽婆住王舍城耆闍崛山中，与大比丘众千二百五十人俱，诸菩萨摩訶萨无量无边不可称计。

尔时，慧命舍利弗于大众中即从座²起，前至佛所，到已顶礼佛足，退坐一面，合掌白佛言：“世尊！一切众生从无始世来，周旋六道，往来三界，于四生中轮回生死，受苦无穷。世尊！此众生聚、众生海为有增减？为无增减？此义深隐，我未能解。若人问我，当云何答？”

尔时，世尊告舍利弗：“善哉！善哉！舍利弗，汝为安隐一切众生、安乐一切众生、怜愍一切众生、利益一切众生、饶益安乐一切众生诸天、人故，乃能问我是甚深义。舍利弗，汝若不问如来、应供、正遍知如是义者，有多过咎。所以者何？于现在世及未来世诸天、人等一切众生，长

¹ 丽本：元魏北印度三藏菩提流支译

² 丽本：坐；永乐北藏本及龙藏本：座

受衰恼损害之事，永失一切利益安乐。

“舍利弗，大邪见者，所谓见众生界增、见众生界减。舍利弗，此大邪见诸众生等以是见故，生盲无目，是故长夜妄行邪道，以是因缘，于现在世堕诸恶趣。舍利弗，大险难者，所谓取众生界增，坚著妄执；取众生界减，坚著妄执。舍利弗，此诸众生坚著妄执，是故长夜妄行邪道，以是因缘，于未来世堕诸恶趣。

“舍利弗，一切愚痴凡夫不如实知一法界故，不如实见一法界故，起邪见心，谓众生界增、众生界减。舍利弗，如来在世，我诸弟子不起此见。若我灭后过五百岁，多有众生愚无智慧，于佛法中，虽除须发，服三法衣，现沙门像，然其内无沙门德行。如是等辈，实非沙门自谓沙门，非佛弟子谓佛弟子，而自说言：‘我是沙门，真佛弟子。’如是等人起增减见，何以故？此诸众生以依如来不了义经，无慧眼故，远离如实空见故，不如实知如来所证初发心故，不如实知修习³无量菩提功德行故，不如实知如来所得无量法故，不如实知如来无量力故，不如实知如来无量境界故，不信如来无量行处故，不如实知如来不思議

³ 丽本：集；永乐北藏本及龙藏本：习

无量法自在故，不如实知如来不思议无量方便故，不如实知⁴分别如来无量差别境界故，不能善入如来不可思议大悲故，不如实知如来大涅槃故。

“舍利弗，愚痴凡夫无闻慧故，闻如来涅槃起断见、灭见；以起断想及灭想故，谓众生界减，成大邪见极重恶业。复次，舍利弗，此诸众生依于减见复起三见，此三种见与彼减见不相舍离犹如罗网。何谓三见？一者，断见，谓毕竟尽；二者，灭见，谓即涅槃；三者，无涅槃见，谓此涅槃毕竟空寂。舍利弗，此三种见，如是缚、如是执、如是触，以是三见力因缘故，展转复生二种邪见，此二种见与彼三见不相舍离犹如罗网。何谓二见？一者，无欲见；二者，毕竟无涅槃见。舍利弗，依无欲见复起二见，此二种见与无欲见不相舍离犹如罗网。何谓二见？一者，戒取见；二者，于不净中起净颠倒见。舍利弗，依毕竟无涅槃见复起六种见，此六种见与无涅槃见不相舍离犹如罗网。何谓六见？一者，世间有始见；二者，世间有终见；三者，众生幻化所作见；四者，无苦无乐见；五者，无众生事见；六者，无圣谛见。

⁴ 丽本：不能如实；永乐北藏本及龙藏本：不如实知

“复次，舍利弗，此诸众生依于增见复起二见，此二种见与彼增见不相舍离犹如罗网。何谓二见？一者，涅槃始生见；二者，无因无缘忽然而有见。舍利弗，此二种见令诸众生于善法中无愿欲心、勤精进心。舍利弗，是诸众生，以起如是二种见故，正使七佛如来、应、正遍知次第出世为其说法，于善法中若生欲心、勤精进心无有是处。舍利弗，此二种见乃是无明诸惑根本，所谓涅槃始生见、无因无缘忽然而有见。

“舍利弗，此二种见乃是极恶根本大患之法。舍利弗，依此二见起一切见，此一切见与彼二见不相舍离犹如罗网。一切见者，所谓若内、若外、若粗、若细、若中种种诸见。所谓增见、减见，舍利弗，此二种见依止一界、同一界、合一界。一切愚夫⁵不如实知彼一界故，不如实见彼一界故，起于极恶大邪见心，谓众生界增，谓众生界减。”

尔时，慧命舍利弗白佛言：“世尊！何者是一界，而言一切愚痴凡夫不如实知彼一界故，不如实见彼一界故，起于极恶大邪见心，谓众生界增，谓众生界减？”

⁵ 丽本：愚痴凡夫；永乐北藏本及龙藏本：愚夫

舍利弗言：“善哉！世尊！此义甚深，我未能解。惟⁶愿如来为我解说，令得解了。”

尔时，世尊告慧命舍利弗：“此甚深义，乃是如来智慧境界，亦是如来心所行处。舍利弗，如是深义，一切声闻、缘觉智慧所不能知、所不能见、不能观察，何况一切愚痴凡夫而能测量？惟⁷有诸佛如来智慧乃能观察知见此义。舍利弗，一切声闻、缘觉所有智慧于此义中唯可仰信，不能如实知见观察。舍利弗，甚深义者，即是第一义谛；第一义谛者，即是众生界；众生界者，即是如来藏；如来藏者，即是法身。舍利弗，如我所说法身义者，过于恒沙不离不脱、不断不异、不思議佛法如来功德智慧。

“舍利弗，如世间灯，所有明色及触不离不脱。又如摩尼宝珠，所有明色形相不离不脱。舍利弗，如来所说法身之义亦复如是，过于恒沙不离不脱、不断不异、不思議佛法如来功德智慧。舍利弗，此法身者，是不生不灭法，非过去际，非未来际，离二边故。舍利弗，非过去际者，离生时故；非未来际者，离灭时故。舍利弗，如来

⁶ 丽本：唯；永乐北藏本及龙藏本：惟

⁷ 丽本：唯；永乐北藏本及龙藏本：惟

法身常，以不异法故，以不尽法故。舍利弗，如来法身恒，以常可归依故，以未来际平等故。舍利弗，如来法身清凉，以不二法故，以无分别法故。舍利弗，如来法身不变，以非灭法故，以非作法故。

“舍利弗，即此法身过于恒沙无边烦恼所缠，从无始世来，随顺世间波浪漂流，往来生死，名为众生。

“舍利弗，即此法身厌离世间生死苦恼，舍弃一切诸有欲求，行十波罗蜜，摄八万四千法门，修菩提行，名为菩萨。

“复次，舍利弗，即此法身离一切世间烦恼使缠，过一切苦，离一切烦恼垢得⁸清净；住于彼岸清净法中，到一切众生所愿之地，于一切境界中究竟通达更无胜者；离一切障，离一切碍，于一切法中得自在力，名为如来、应、正遍知。

“是故，舍利弗，不离众生界有法身，不依法身有众生界；众生界即法身，法身即众生界。舍利弗，此二法者，义一名异。

“复次，舍利弗，如我上说，众生界中示⁹三

⁸ 丽本：得净得清净；永乐北藏本及龙藏本：得清净

⁹ 丽本：亦；永乐北藏本及龙藏本：示

种法，皆真实如，不异不差。何谓三法？一者，如来藏本际相应体及清净法；二者，如来藏本际不相应体及烦恼缠不清净法；三者，如来藏未来际平等恒及有法。

“舍利弗当知，如来藏本际相应体及清净法者，此法如实不虚妄，不离不脱，智慧清净。真如法界不思議法，无始本际来，有此清净相应法体。舍利弗，我依此清净真如法界，为众生故说为不可思議法自性清淨心。

“舍利弗当知，如来藏本际不相应体及烦恼缠不清净法者，此本际来离脱不相应烦恼所缠不清净法，惟¹⁰如来菩提智之所能断。舍利弗，我依此烦恼所缠不相应不思議法界，为众生故说为客尘烦恼所染自性清淨心不可思議法。

“舍利弗当知，如来藏未来际平等恒及有法界¹¹者，即是一切诸法根本，备一切法，具一切法，于世法中不离不脱，真实一切法，住持一切法，摄一切法。舍利弗，我依此不生不灭、常恒清凉、不变归依、不可思議、清淨法界说名众生。所以者何？言众生者，即是不生不灭、常恒清凉、

¹⁰ 丽本：唯有；永乐北藏本及龙藏本：惟

¹¹ 丽本：法；永乐北藏本及龙藏本：法界

不变归依、不可思议、清净法界等异名。以是义故，我依彼法说名众生。

“舍利弗，此三种法皆真实如，不异不差，于此真实如不异不差法中，毕竟不起极恶不善二种邪见。何以故？以如实见故。所谓减见、增见，舍利弗，此二邪见，诸佛如来毕竟远离，诸佛如来之所诃责。

“舍利弗，若有比丘、比丘尼、优婆塞、优婆夷，若起一见，若起二见，诸佛如来非彼世尊。如是等人，非我弟子。舍利弗，此人以起二见因缘故，从冥入冥，从暗入暗，我说是等名一阐提。是故，舍利弗，汝今应学此法化彼众生，令离二见住正道中。舍利弗，如是等法，汝亦应学，离彼二见住正道中。”

佛说此经已，慧命舍利弗，比丘、比丘尼、优婆塞、优婆夷、菩萨摩訶萨及诸天、龙、夜叉、乾闥婆、阿修罗、迦楼罗、紧那罗、摩睺罗伽、人、非人等一切大众，皆大欢喜，信受奉行。

佛说不增不减经

● 结诵仪

补阙真言

(三遍)

南無喝啰怛那. 哆啰夜耶. 佉啰佉啰. 俱住俱住.
摩啰摩啰. 虎啰. 吽. 贺贺. 苏怛拏. 吽. 泼抹拏. 娑
婆诃.

补阙圆满真言

(三遍)

唵. 呼嚧呼嚧. 社曳穆契. 莎诃.

普回向真言

(三遍)

唵^一娑摩啰^二娑摩啰^三弥摩曩^四萨哈^{呼马切}啰^五摩诃^{爻上声}咱^六
哈啰吽^六

南無佛 南無法 南無僧 (合掌三称)

南無本师释迦牟尼佛 (合掌三称)

南無观世音菩萨摩诃萨 (合掌三称)

南無护法诸天菩萨 (合掌三称)

礼佛发愿文

(一遍)

归命十方调御师 演扬清净微妙法
三乘四果解脱僧 愿赐慈悲哀摄受

但(某甲)自违真性，枉入迷流。随生死以飘沉，逐色声而贪染。十缠十使，积成有漏之因；六根六尘，妄作无边之罪。迷沦苦海，深溺邪途。著我耽人，举枉措直。累生业障，一切愆尤，仰三宝以慈悲，沥一心而忏悔。

所愿能仁拯拔，善友提携。出烦恼之深源，到菩提之彼岸。此世福基命位，各愿昌隆；来生智种灵苗，同希增秀。生逢中国，长遇明师。正信出家，童真入道。六根通利，三业纯和。不染世缘，常修梵行。执持禁戒，尘业不侵。严护威仪，蝇飞无损。不逢八难，不缺四缘。般若智以现前，菩提心而不退。修习正法，了悟大乘。开六度之行门，越三祇之劫海。建法幢于处处，破疑网于重重。降伏众魔，绍隆三宝。承事十方诸佛，无有疲劳。修学一切法门，悉皆通达。广作福慧，普利尘沙。得六种之神通，圆一生之佛果。然后不舍法界，遍入尘劳。等观音之慈心，行普

贤之愿海。他方此界，逐类随形。应现色身，演扬妙法。泥犁苦趣，饿鬼道中，或放大光明，或现诸神变，其有见我相，乃至闻我名，皆发菩提心，永出轮回苦。火镬冰河之地，变作香林；饮铜食铁之徒，化生净土。披毛戴角，负债含怨，尽罢辛酸，咸沾利乐。疾疫世而现为药草，救疗沉痾；饥馑时而化作稻粱，济诸贫馁。但有利益，无不兴崇。次期累世冤亲，现存眷属，出四生之汨没，舍万劫之爱缠。等与含生，齐成佛道。虚空有尽，我愿无穷。情与无情，同圆种智。

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

十方三世一切佛。一切菩萨摩訶萨。摩訶般若波罗蜜。

三皈依

(一遍)

自皈依佛，当愿众生，体解大道，发无上心；
自皈依法，当愿众生，深入经藏，智慧如海；自
皈依僧，当愿众生，统理大众，一切无碍。和南
圣众。



此咒置经书中可灭误跨之罪

南无护法韦驮尊天菩萨

